

Objavljeno: 01. 01. 2016

## **ANALIZA: 2016. JE GODINA NADE I RAZVOJA BiH**



### **TE Tuzla: Kapitalni energetska projekt**

Godina 2016., osvrnemo li se na protekla dva mjeseca, koja su, nakon ulaska SBB-a u federalnu i druge nivoe vlasti, obilježena znatnim ubrzanjem provođenja reformi, mogla bi predstavljati svojevrsnu prekretnicu, ne samo kada je u pitanju euroatlantski put BiH nego i njen razvoj ka stabilnoj i prosperitetnoj državi.

Štaviše, uzmu li se u obzir planovi najprofitabilnijih kompanija poput „Elektroprivrede BiH“, ali i vladini projekti, procjene su da se, posebno u Federaciji, može očekivati svojevrsni bum u elektroenergetici te u cestogradnji!

### **Opipljivi rezultati**

Razlog za ovakvu dozu optimizma ne treba tražiti samo u izjavama pojedinih lidera i zvaničnika u vlasti nego i u opipljivim rezultatima te već pokazanim signalima iz Brisela, odnosno institucija EU i NATO-a.

Kada je riječ o integracijama u EU, već bismo 15. februar na kalendaru mogli zaokružiti kao izrazito važan datum. Tada bi, naime, prema relevantnim informacijama iz Brisela, Vijeće za vanjske poslove EU na svom zasjedanju već moglo razmatrati kredibilnost bh. aplikacije za kandidatski status u Uniji. Svakako, ako se ostvari najava iz Predsjedništva BiH o tome da ćemo u januaru predati zahtjev za članstvo u EU.

Ako bismo najave iz Predsjedništva BiH ostavili po strani te analizirali ono što nam u najvećoj mjeri osigurava kandidatski status, a to je napredovanje u ispunjavanju mjera iz Reformske agende, onda razloga za optimizam itekako možemo naći.

Vlada FBiH, naime, u tom pogledu najviše je odmakla ispunivši u vrlo kratkom roku skoro četvrtinu zacrtanih mjera, uključujući donošenje zakona o radu, o unutrašnjem platnom prometu te o dobiti, pripremivši istovremeno donošenje dva zaista krupna zakonska rješenja, ključna za stabilizaciju socijalnih prilika te fiskalne održivosti.

To su zakoni o PIO/MIO te o uvezivanju radnog staža. No, upravo u periodu kada će se razmatrati aplikacija za članstvo u EU, očekuje se i donošenje novih zakonskih rješenja koja će urediti oblasti doprinosa te poreza na dohodak.

### **Dodatni poticaj**

Može se očekivati da već u prvim sedmicama 2016. bude utvrđeno konačno rješenje za koordinacijski mehanizam te u pregovorima s Hrvatskom i EU završi trgovinski dio Sporazuma o stabilizaciji i pridruživanju, kako zvanične institucije Unije ne bi imale nikakve dileme pri razmatranju naše aplikacije.

A događaj koji se zove samit NATO-a u Varšavi u junu bi za našu državu mogao biti zaista historijski, s obzirom na nagovještaje da bi BiH mogla konačno dobiti zeleno svjetlo za aktiviranje Akcionog plana za članstvo (MAP).

Iako je nesaradnja vlasti u RS, kada je riječ o uknjižavanju vojne imovine na državu, i dalje očigledna, zeleno svjetlo za MAP trebalo bi prije svega predstavljati dodatni poticaj za našu državu, prvenstveno zarad očuvanja stabilnosti na ovom području, da nakon Crne Gore BiH bude sljedeća zemlja zapadnog Balkana koja će dobiti poziv za prijem u najjači vojno-politički blok na svijetu.

### **Milijarde investicija**

Prema informacijama obznanjenim iz „Elektroprivrede BiH“, planom poslovanja za 2016. godinu planiran je početak investicijskog ciklusa od čak 2,4 milijarde KM. Tako je najavljen početak gradnje novih kapitalnih projekata poput TE Tuzla, vrijednosti 1,4 milijarde KM, zatim HE Vranduk (127 miliona KM), mini hidroelektrane na Neretvici (97 miliona KM), kao i vjetroparka Podveležje, čija vrijednost iznosi (140 miliona KM). Novi plan EPBiH predviđa i ulaganja u rudnike u iznosu od 434,7 miliona KM, i to kroz njihovu dokapitalizaciju.

Iz "Autocesta FBiH" već je najavljeno da do 2020. planiraju realizirati novih 85 kilometara autoputa te inicirati projekte dužine 62 kilometra koji će se graditi putem koncesija. Riječ je o dionicama od Međugorja prema Počitelju i dalje prema Mostaru, zatim od Zenice jug prema Zenici sjever, pa sve do Žepča, te od Svilaja do Odžaka. Ugovorom potpisanim s EBRD-om već je za 2016. godinu osigurano 160 miliona KM za dionice Počitelj – Buna, kao i nastavak gradnje dionice Zenica jug - Zenica sjever.

Vlada FBiH i kompanija „Ceste FBiH" užurbano rade na realizaciji projekta „Modernizacija magistralnih cesta u Federaciji", za šta će biti izdvojeno ukupno 300 miliona maraka. Plan je sanirati 290 kilometara i 35 saobraćajnica.

Autor: A. DUČIĆ

Objavljeno:13. 01. 2016.

## **Bit će cesta, trafostanica i vjetroturbine**

# **ELEKTROPRIVREDA BIH POČINJE GRADNJU VE PODVELEŽJE KRAJEM 2016?**



Vlada Federacije BiH dala je saglasnost "Elektroprivredi BiH" za izgradnju vjetroelektrane "Podveležje" na području Mostara, što podrazumijeva prvo gradnju ceste, trafostanica, a zatim i vjetroturbine.

- Početak aktivnosti gradnje na projektnom području vjetroelektrane "Podveležje" planiran je za četvrti kvartal 2016. godine. Finansijska sredstva su

osigurana iz kreditnih sredstava Njemačke razvojne banke KfW u iznosu od 90 posto investicije, dok vlastita sredstva iznose oko 10 posto investicije - potvrđeno je iz Službe za komunikacije "Elektroprivrede BiH".

Njemačka razvojna banka odobrila je "Elektroprivredi BiH" kredit za finansiranje izgradnje vjetroparka "Podveležje" u iznosu od 65 miliona eura. Uz kredit KfW-a, izgradnja će biti finansirana i sa 6,8 miliona eura vlastitog novca "Elektroprivrede BiH".

Kažu da se prvi proizvedeni kilovat-sati iz vjetroelektrane "Podveležje", instalisane snage 48 MW i planirane godišnje proizvodnje električne energije 120 GWh, očekuju u posljednjem kvartalu 2018. godine.

Autor: Fena

## Najveći porast vrijednosti dionica Elektroprivrede BiH



Najveći porast vrijednosti dionica Elektroprivrede BiH

**Fena** 19.01.2016

Na današnjem trgovanju na Sarajevskoj berzi (SASE) ostvaren je ukupan promet od 194.753,73 KM, a u sklopu 30 transakcija ukupno je prometovano 15.239 vrijednosnih papira.

Vrijednost BIFX-a nije se mijenjala u odnosu na prošlo trgovanje.

Vrijednost indeksa SASX-10 porasla je za 9,99 indeksnih poena na 693,68 poena što u odnosu na prošlo trgovanje predstavlja rast od 1,46 posto.

Vrijednost indeksa SASX-30 je pala za 4,90 indeksnih poena na 991,23 poena što u odnosu na prošlo trgovanje predstavlja pad od 0,49 posto.

Na kotaciji kompanija trgovalo se dionicama emitenta Boanalijak d.d. Sarajevo (simbol: BSNLR) u iznosu 12.623,75 KM, a kroz tri transakcije prometovano je 1.227 dionica.

Na kotaciji IF-ova trgovano je u iznosu 3.408 KM, a u jednoj transakciji prometovano je 1.136 dionica.

Na kotaciji obveznica ostvaren je ukupan promet od 2.547,32 KM, a protrgovano je 2.637 obveznica FBiH.

Na Slobodnom tržištu - ST1 ostvaren je ukupan promet od 150.870,73 KM, a u sklopu 18 transakcija prometovano je 7.866 dionica emitenta.

Najveći dnevni promet ostvaren je dionicama emitenta JP Elektroprivreda BiH d.d. Sarajevo (simbol: JPESR) u iznosu 98.888,46 KM.

Na Slobodnom tržištu - ST2 ostvaren je ukupan promet od 25.303,93 KM, a protrgovane su 2.373 dionice kroz šest transakcija. Najveći dnevni promet ostvaren je dionicama emitenta UNIS GINEX d.d. Goražde (simbol: GINXR) u iznosu 12.838,93 KM.

Najveći porast vrijednosti, od po 6,19 posto, zabilježile su dionice JP Elektroprivreda BiH d.d. Sarajevo (simbol: JPESR) i dostigle cijenu 17,49 KM, dok su najveći pad vrijednosti danas registrovale dionice emitenta RMU Banovići d.d. Banovići (symbol: RMUBR) od 14,95 posto s cijenom 17,01 KM, saopšteno je iz Sarajevske berze.

Objavljeno: 18. 03. 2016

**Ministar potvrdio za "Avaz"**

## **DŽINDIĆ: Radovi na HE Vranduk počinju 1. aprila**



Džindić: Potpisani ugovori

Gradnja hidroelektrane (HE) Vranduk na rijeci Bosni, u šta će biti uložena 112,3 miliona maraka, početak će 1. aprila, potvrdio nam je jučer Nermin Džindić, federalni ministar energije, rudarstva i industrije.

Radi se o gradnji prve hidrocentrale u BiH nakon 40 godina, koja će biti u vlasništvu „Elektroprivrede BiH“. Ugovor o gradnji

potpisan je početkom godine s čelnicima konzorcija kompanija „Strabag“ i „Končar“, koji su dostavili najbolju ponudu za ovaj veliki posao.



*HE Vranduk: Bit će uloženo 112,3 miliona KM*

Potpisan je ugovor po sistemu „ključ u ruke“, a obuhvata izradu projektne dokumentacije, proizvodnju, isporuku i montažu opreme, izvođenje građevinskih radova, testiranje i puštanje postrojenja u pogon.

Nakon završetka projektne dokumentacije, za 1. april planiran je početak radova, dok je rok za završetak 46 mjeseci.

Prema najavama firmi koje su dobile ovaj posao, jezero Vranduk bit će dugo šest kilometara, dok će visina brane iznositi 19, a dužina 120 metara.

## **Brojke**

**112,3** miliona KM vrijednost gradnje HE Vranduk

**19** megavati iznositi će instalirana snaga


**96** gigavat-sati bit će godišnja proizvodnja

Autor: M. Aš.

Objavljeno: 19. 03. 2016

## Mjesto gdje će se graditi prva hidroelektrana u BiH nakon 40 godina

# AVAZ U POSJETI Projekt za bolju budućnost Vranduka, ali i cijele BiH



Dio na kojem će se graditi hidroelektrana  
(Foto: J. Hadžić)

Nakon što je Nermin Džindić, federalni ministar energije, rudarstva i industrije, najavio za naš list da će radovi na hidrocentrali "Vranduk" početi 1. aprila, reporteri "Dnevnog avaza" jučer su se uputili u ovo mjesto kako bi razgovarali s lokalnim stanovništvom i čuli glas

mještana o jednom od značajnijih razvojnih projekata.

### Ništa protiv

Iako su se jedno vrijeme protivili gradnji ovog energetskeg objekta, pogotovo jer su njihovo mjesto, Vranduk, koristili razni političari u izborne kampanje, sada su konačno vidjeli konkretnost i odlučnost vlasti koja će u saradnji s investitorom "Elektroprivredom BiH" uložiti u gradnju hidroelektrane 112,3 miliona maraka, i nemaju ništa protiv projekta.

Dok su silajdžići, nikšići i njihovi politički puleni na poziciji direktora "Elektroprivrede" dolazili na lokalitet hidroelektrane koju su oni gradili samo na predizbornim plakatima, a narodu obećavali da će početi gradnju, ulaskom Saveza za bolju budućnost BiH u vlast prvi konkretni koraci su vidljivi posljednjih nekoliko mjeseci.



*Zikret i Edin Šarić: U početku se protivili gradnji*



Na samom početku skretanja s magistrale M-17, u neposrednoj blizini planirane brane, nalazi se kuća Edina Šarića i njegove majke. Edin nam je kazao da su dolazili ljudi iz Sarajeva, snimali teren i njegovu kuću.

- U početku smo se bunili protiv tog objekta, to bi značilo da se mi moramo iseliti i to nam nije bilo pravo. Također, i prije nekoliko godina dolazili su tu, dovozili mašine i slikali se. Ne znam, projekt je dobar, šteta je da rijeka onako protječe, sila je to - kaže Šarić.

Njegov komšija Zikret Šarić očekuje da će cijeli kraj, kako je kazao, živnuti tokom gradnje velikog razvojnog projekta i da će lokalno stanovništvo imati koristi.

### **Značajan projekt**

- Uradili smo rasvjetu, popravili puteve, ono što je rečeno, to su i ispoštovali. Mi smo svjesni da država mora ići naprijed i da smetnji za ovakve projekte ne smije biti. Jer, mi smo davno prešli mjeru s termoelektranama koje koriste uglj, Evropa hoće čistu energiju - procjenjuje Šarić.

Ranije je za naš list Bajazit Jašarević, direktor "Elektroprivrede BiH", izjavio da će biti ispunjeni svi dogovoreni zahtjevi lokalnog stanovništva.

- Nema potrebe da zbog nekih 100.000 KM, koliko bi koštao vodovod za lokalno stanovništvo, dovodimo u pitanje tako značajan projekt - rekao je Jašarević.

Nakon završetka projektne dokumentacije, za 1. april planiran je početak radova, dok je rok za završetak 46 mjeseci. Prema najavama konzorcija "Strabag" - "Končar", jezero Vranduk bit će dugo šest kilometara, dok će visina brane iznositi 19, a dužina 120 metara. Ovo će ujedno biti i prva hidroelektrana koja će se graditi u BiH nakon 40 godina.

## **Turisti i tvrđava**

Vranduk odlikuje prelijepa tvrđava koja je naročito u ljetnim mjesecima u žiži interesiranja velikog broja stranih, ali i domaćih turista.

- Nadamo se da gradnja hidroelektrane neće utjecati na posjete turista, od kojih se nešto i ušićari. Ne bi trebalo - kažu naši sagovornici.

Autor: E. TRAKO

**Od 27. marta 2016. godine**

## **JP ELEKTROPRIVREDA BIH Mijenja se vrijeme važenja tzv. jeftinije i skuplje struje**

Objavljeno: 24. 03. 2016.



Promjena dnevnih tarifnih stavova

Iz direkcije JP Elektroprivreda BiH, obavještavaju kupce električne energije, koje snabdijeva Javno preduzeće Elektroprivreda BiH, da će prelaskom na ljetno računanje vremena, 27. marta 2016. godine, nastupiti i promjena u primjeni većih i manjih dnevnih tarifnih stavova u obračunu potrošnje

električne energije, odnosno, mijenja se vrijeme važenja tzv. jeftinije i skuplje struje.

Za domaćinstvima, koja posjeduju dvotarifna brojila, manji dnevni tarifni stavovi primjenjivaće se radnim danima i subotom u periodima od 14 do 17 sati i od 23 do 08 sati, a nedjeljom cijeli dan.

Za ostale kupce JP Elektroprivreda BiH, manji dnevni tarifni stavovi primjenjivat će se radnim danima u periodima od 23 do 08 sati, a subotom i nedjeljom cijeli dan.

Cijena električne energije za domaćinstva, koja imaju jednotarifna brojila, iznosi 13,46 feninga/kWh. Za dvotarifna brojila cijena veće tarife iznosi 16,82 feninga/kWh, a cijena manje tarife je 8,41 feninga/kWh, saopćavaju iz JP Elektroprivreda BiH.

# OSLOBODENJE

Objavljeno 18.04.2016.

## PROŠLOGODIŠNJI GUBITAK RUDNIKA U FEDERACIJI BiH 96 MILIONA KM

**Gubitak rudnika u Federaciji BiH (FBiH) u prošloj godini iznosio je 96 miliona KM, rečeno je na današnjem sastanku federalnog premijera Fadila Novalića sa delegacijom Sindikata radnika rudnika u FBiH**



Na sastanku je izraženo očekivanje da će zajedničkim mjerama Vlade FBiH, Ministarstva energije, rudarstva i industrije i Javnog preduzeća Elektroprivreda BiH gubitak biti prepolovljen ove godine.

Govoreći o terenu situaciji ovoj oblasti, Novalić je istakao da se naredne tri godine u ovom sektoru "trči najvažniji krug, nakon čega će, ako se to preživi, biti puno jače i otpornije", saopšteno je iz Vlade FBiH.

Federalni ministar energije, rudarstva i industrije Nermin Džindić rekao je da je neophodno zajedničko djelovanje da bi bio postignut zajednički cilj i rudnici osposobljeni da posluju pozitivno, naglasivši da je jedan broj njih već počeo dobro poslovati sa tendencijom daljeg rasta.

Generalni direktor Elektroprivrede BiH Bajazit Jašarević kaže da je potrebno da se efekti investicija u rudarstvo što prije osjete i da se uspostavi održivo stanje rudnika, uz povećanje proizvodnje, koja je uslov za opstanak i razvoj rudnika.

Izvršni direktor za proizvodnju u Elektroprivredi BiH Dževad Ikanović kaže da će od 2016. do 2018. godine ova kompanija u rudnike u FBiH investirati 329 miliona KM radi povećanja proizvodnje i unapređenja uslova rada i bezbjednosti.

"Taj investicioni ciklus treba rudnike dovesti u stanje održivosti i zadovoljiti potrebe postojećih termoblokova, ali i onih koji će biti građeni", rekao je Ikanović.

Na sastanku je bilo riječi i o nadavnom štrajku u rudniku Mramor, za koji je rečeno da je pokrenut i organizovan od onih koji "pokušavaju da onemoguće put ozdravljenja rudnika kojim se zajednički krenulo".



# Računi Elektroprivrede BiH isključivo preko BH Pošte

Objavljeno 23/05/2016



Federalna vlada obavezala je JP Elektroprivreda BiH d.d. Sarajevo da usluge prijema, prenosa i uručenja pismonosnih pošiljki, pisama – računa obavlja isključivo putem JP BH Pošta d.o.o. Sarajevo kao ovlaštenog javnog poštanskog operatera. Ova obaveza EPBiH proizilazi iz Zakona o poštanskom prometu FBiH kojim je regulisano da usluge prijema, prenosa i uručenja pismonosnih pošiljki, kao i

poštanskih usluga, može pružiti ovlaštena pravna osoba koja je u isključivom ili većinskom državnom vlasništvu.

Shodno ovlaštenjima za obavljanje poštanskih usluga koje je do sada izdala Agencija za poštanski promet, BH Pošta je jedini javni poštanski operater koji svojom mrežom pokriva područje djelatnosti Elektroprivrede BiH, odnosno jedini poštanski operater koji ima poslovnice na području na kojem ih ima i Elektroprivreda BiH, što je neophodno radi bržeg i efikasnijeg uručenja pošiljki i njihovog povrata u slučaju neizvršenja dostave.

Rok za realizaciju ovog zaduženja je 15 dana od dana stupanja na snagu, o čemu je Elektroprivreda BiH dužna izvijestiti Vladu Federacije BiH.

## Detaljan plan za obnovu "kičme" domaće industrije

# OTKRIVAMO Najveći investicioni ciklus u bh. rudnicima!

Objavljeno: 03. 06. 2016.

uglja od strane Vladajućeg Društva za period 2016. - 2018. godina

bolju opremu za rad

ZD rudnike uglja	Planirana investiciona ulaganja od strane Vladajućeg Društva - novi investicioni ciklus
<b>Rudnici Kreka</b>	<b>158.335.091 KM</b>
<b>RMU Durdevik</b>	<b>35.650.000 KM</b>
<b>RMU Kakanj</b>	<b>69.095.000 KM</b>
<b>RMU Breza</b>	<b>40.870.000 KM</b>
<b>RMU Zenica</b>	<b>3.050.000 KM</b>
<b>RMU Ćabid Lolić</b>	<b>12.094.143 KM</b>
<b>RU Gračanica</b>	<b>10.570.000 KM</b>



Rudari: Dobit će bolju opremu za rad

Uprava koncerna "Elektroprivrede BiH" (EPBiH) usvojila je prije nekoliko dana model praćenja, dinamike, kontrole i efekata ulaganja 329,6 miliona KM u sedam rudnika koji posluju u sklopu ove državne kompanije, saznaje naš list.

Radi se o do sada najvećem investicionom ciklusu u rudnicima za period od 2016. do 2018. godine i velikoj reformi rudarskog sektora, gdje bi se, osim ulaganja u rudnike, značajno trebala poboljšati i sigurnost u rudnicima koji će komorovima omogućiti lakše i bolje obavljanje poslovnih aktivnosti.

### Najveća ulaganja

Ovo su do sada najveća ulaganja EPBiH i Vlade FBiH u rudnike u Federaciji. Prethodna vlada investirala je u četiri godine svega 150 miliona KM, a aktuelna će za dvije godine 329,6 miliona KM. Zbog nedovoljnog ulaganja u rudnike, nedostatka opreme, u posljednjih šest godina zabilježene su brojne rudarske nesreće sa smrtnim posljedicama.

Naš list došao je jučer u posjed dokumentacije iz koje se jasno vidi koliko će koji rudnik dobiti sredstava. Najveća ulaganja su usmjerena prema Rudniku Kreka, gdje je i najteže stanje. Ovaj rudnik dobit će 158.335.091 KM. Zatim slijedi Rudnik Kakanj sa 69.095.000 KM. U Rudnik Breza bit će investirano 40.870.000 KM, a Rudnik Đurđevik 35.650.000 KM.

Prema planu EPBiH, Rudnik Abid Lolić Han Bila - Travnik dobit će 12.091.143 miliona KM, a Rudnik Gračanica 10.570.000 KM. U Rudnik Zenica bit će uloženo 3.050.000 KM. Ova ulaganja značit će i bolju opremu u rudnicima.

No, EPBiH, da bi imala jasnu sliku ulaganja sredstava u rudnike i da bi se izbjegla višegodišnja praksa netransparentnosti kada je u pitanju ovaj sektor, formirala je prije deset dana i timove za praćenje realizacije svih ulaganja od početka realizacije projekta, tendera, do potpisivanja ugovora. Radi se o timovima u koji su uključeni i članovi Ministarstva rudarstva, energije i industrije FBiH te uposlenici EPBiH. Usvojen je i način izvještavanja praćenja realizacije ovih investicija koji će biti sačinjavan kvartalno, najkasnije 15 dana po isteku kvartala.

### **Obaveza rudnika**

Na ovaj način i obaveza rudnika je da za svaki pojedinačni investicioni projekt formira timove i za reviziju tehničkog dijela tenderske dokumentacije, s mogućnošću dorade i korekcije. Završnu riječ o svemu, prije zaključivanja svakog ugovora, dat će Uprava i Nadzorni odbor EPBiH.

## **Rudarske nesreće u posljednjih šest godina**

- 10. marta 2016. smrtno stradao rudar Nermin Šehić u jami Omazići Rudnika mrkog uglja Banovići
- 13. oktobra 2015. četiri rudara poginula u Rudniku mrkog uglja Kakanj
- 4. septembra 2014. pet rudara smrtno stradalo u zeničkom Rudniku mrkog uglja, u jami Raspotočje
- 19. marta 2014. jedan rudar smrtno stradao u RMU Abid Loli u Han Biloj kod Travnika
- 30. marta 2014. povrijeđeno 11 rudara u RMU Zenica
- 5. avgusta 2013. jedan rudar smrtno stradao u Staroj jami u Zenici, dok je šest rudara zadobilo lakše i teže povrede
- 6. maja 2012. život izgubio rudar Sakib Tatarević u nesreći u Rudniku Breza
- 5. septembra 2012. u brezanskom rudniku smrtno stradao 26-godišnji Almir Hajduković, član spasilačke čete
- 23. marta 2010. povrijeđeno 14 rudara u RMU Raspotočje
- 26. januara 2008. život izgubio Mugdim Spahić, rudar RMU Kakanj

**Na pomolu zajednički projekti**

## **DŽINDIĆ I PREDSTAVNICI MAĐARSKE KOMPANIJE O SARADNJI SA ELEKTROPRIVREDOM**

Objavljeno: 11. 07. 2016



Federalni ministar energije, rudarstva i industrije Nermin Džindić razgovarao je danas s predstavnicima mađarske kompanije MVM Group o mogućoj saradnji između JP Elektroprivreda BiH i te kompanije.

Džindić i predstavnici mađarske kompanije dogovorili su kako će do

septembra tekuće godine sačiniti zajednički memorandum o saradnji, a da će njegovom potpisivanju prethoditi razmjena podataka oko mogućih zajedničkih projekata koji se tiču hidro, vjetro i solarne energije.

Kompanija MVM Group iz Mađarske bavi se proizvodnjom, distribucijom i prodajom električne energije u čije su ime sastanku prisustvovali generalni direktor MVM Ovit Norbert Dr. Korom, zamjenik generalnog direktora MVM Partner Kornel Czinege, strateški direktor MVM Group Andras Totth i zamjenik generalnog direktora za prodaju i trgovinu MVM Gas Trade Gabor Orban.

Sastanku su prisustvovali i svi izvršni direktori Elektroprivrede BiH, te bivši premijer FBiH Nedžad Branković, saopćeno je iz Federalnog ministarstva energije, rudarstva i industrije, prenosi Ured za odnose s javnošću Vlade FBiH.

# OSLOBODENJE

Objavljeno:26.08.2016

## DELEGACIJA KINESKE DRŽAVNE EXIM BANKE DOLAZI U POSJETU ELEKTROPRIVREDI BIH

Premijer Federacije Bosne i Hercegovine Fadil Novalić, sa saradnicima, primio je danas u sjedištu Vlade FBiH u Sarajevu delegaciju Ambasade Republike Kine u BiH na čelu sa ambasadoricom Chen Bo.



Susretu je prisustvovao i federalni ministar energije, rudarstva i industrije Nermin Džinić.

Ekonomске teme bile su u središtu ovih razgovora, s posebnim naglaskom na elektro-energetski sektor, u čemu Kina i njene kompanije ima značajne ambicije na bosanskohercegovačkom tržištu.

Istaknuti su značajni projekti poput izgradnje Bloka 7 Termoelektrane Tuzla, kapaciteta 450 megavata i

Termoelektrane Tuzla, snage 350 megavata, te potreba ubrzanja njihove realizacije.

Ambasadorica Kine je naglasila da se trenutno vode završni pregovori i konsultacije oko potpisivanja ugovora o izgradnji Bloka 7 i da se stvari kreću u dobrom pravcu.

Za 10. septembar najavila je posjetu delegacije kineske državne Exim banke Elektroprivredi BiH, kada bi trebala biti donesena konačna odluka o kreditu za izgradnju ovog značajnog energetskog objekta. Bo je izrazila nadu i uvjerenje da će ugovor biti potpisan najkasnije do kraja ove godine.

Zaključeno je da se kontakti dviju strana nastave i ubrza priprema kompletnog projekta za realizaciju ove značajne investicije u energetski sektor BiH.

Bilo je riječi i određenim projektima bespovratne pomoći kineske strane u robi i uslugama kroz saradnju s lokalnim zajednicama.



# OSLOBODENJE

Objavljeno:11.10.2016

## Potpisan Ugovor o snabdijevanju električnom energijom Aluminija d.d. Mostar

U Direkciji JP Elektroprivreda BiH u Sarajevu danas je s predstavnicima Aluminija d.d. Mostar potpisan Ugovor o prodaji i kupovini, isporuci i prijemu električne energije u 2017. godini.



Za JP Elektroprivreda BiH ugovor su potpisali Bajazit Jašarević, generalni direktor i Džemo Borovina, izvršni direktor za snabdijevanje i trgovinu, a u ime Aluminija d.d. Mostar Mario Gadžić, direktor i Dražen Pandža, izvršni direktor za ekonomsko-finansijske, računovodstvene i komercijalne poslove.

Zajednička je ocjena potpisnika da prvi ugovor o snabdijevanju Aluminija d.d. Mostar električnom energijom od JP Elektroprivrede BiH ima posebnu važnosti za privredu BiH, s obzirom na to da je JP

Elektroprivreda BiH najveći proizvođač električne energije u državi, a njen najveći potrošač kombinat Aluminij d.d. Mostar.

Naglašeno je da uspostava poslovne saradnje dviju kompanija ima historijski značaj, te da predstavlja početak dugogodišnjeg zajedničkog djelovanja.


Potpisivanju Ugovora prisustvovali su predsjednici nadzornih odbora JP Elektroprivreda BiH i Aluminija d.d. Mostar, Adnan Terzić i Dalibor Miloš i članovi uprava dviju kompanija, saopćeno je iz Službe za komunikacije JP Elektroprivreda BiH.

# OSLOBODENJE

Objavljeno : 27.10.2016.

## U nedjelju vraćanje kazaljki na satovima

Federalno ministarstvo rada i socijalne politike obavještava javnost da je Zakonom o računanju vremena.



...propisano da se ljetno računanje vremena završava posljednje nedjelje u oktobru, tako što se pomjeraju kazaljke na satovima za 60 minuta unazad.

Shodno tome, obavještava se javnost da se ljetno računanje vremena završava u nedjelju, 30.

oktobra, pomijeranjem za jedan sat unazad, na način da će se vrijeme u tri sata računati kao dva, saopćeno je iz Federalnog ministarstva rada i socijalne politike.

Prelaskom na zimsko računanje vremena, od nedjelje će doći do promjene u primjeni većih i manjih dnevnih tarifnih stavova, odnosno, mijenja se vrijeme važenja tzv. jeftinije i skuplje struje za kupce električne energije koje snabdijeva Javno preduzeće Elektroprivreda BiH d.d. Sarajevo.

Za domaćinstva koja posjeduju dvotarifna brojila, manji dnevni tarifni stavovi primjenjivat će se radnim danima i subotom od **13.00** do **16.00** i od **22.00** do **07.00** sati, a **nedjeljom** cijeli dan.

Za sve ostale kupce JP Elektroprivreda BiH, prema manjoj tarifi, obračunavat će se električna energija utrošena od ponedjeljka do petka u periodu od **22.00** do **07.00** sati.

Za ovu kategoriju potrošnje manja tarifa se primjenjuje subotom i nedjeljom cijeli dan, saopćeno je iz Elektroprivrede BiH.

Iako su neke zemlje, poput Rusije i nedavno Republike Turske, uvele stalno ljetno računanje vremena i neće primjenjivati vraćanje kazaljki na satovima u skladu sa zimskim računanjem, to se u Bosni i Hercegovini, po svemu sudeći, još neće dogoditi.

**Služba za komunikacije Elektroprivrede BiH**

## **Elektroprivreda BiH: U oktobru rekordna proizvodnja električne energije**

Objavljeno: 04. 11. 2016.



Elektroprivreda BiH je u oktobru 2016. ostvarila ukupnu proizvodnju električne energije u iznosu 805.738 MWh ili 151,76 posto u odnosu na planiranu proizvodnju.

Poređenjem s ostvarenom mjesečnom proizvodnjom u prethodnim godinama, mjesečna proizvodnja od 805 GWh u oktobru ove godine, predstavlja rekordnu poslijeratnu mjesečnu proizvodnju električne energije.

[inRead](#) Ukupna ostvarena proizvodnja električne energije u termoelektanama iznosila je 678.617 MWh, od čega u Podružnici Termoelektana Tuzla 421.220 MWh, a u Podružnici Termoelektana Kakanj 257.397 MWh. Hidroelektrane na Neretvi u oktobru 2016. proizvele su 127.121 MWh.

U deset mjeseci ove godine ostvaren je značajan napredak u poslovanju rudnika u sastavu Koncerna EPBiH, što se ogleda i kroz povećanje proizvodnje uglja za 13,58 posto.

Posebno značajno povećanje ostvareno je u oktobru kada je u rudnicima proizvedeno 443.914 tona uglja, što je maksimalna proizvodnja uglja u posljednje dvije godine i 10 mjeseci, saopćeno je iz Službe za komunikacije Elektroprivrede BiH.

Objavljeno: 10. 12. 2016

**Prema materijalima za Skupštinu dioničara društva**

## **Prihodi Elektroprivrede BiH premašili milijardu KM**



Elektroprivreda BiH će prvi put u svojoj poslijeratnoj historiji ostvariti ukupne prihode koji premašuju milijardu KM, uprkos činjenici da cijena električne energije na evropskom tržištu nikada nije bila niža.

Prema materijalima za Skupštinu dioničara društva, zakazanu za 30. decembar, a na kojoj će se usvojiti novi trogodišnji plan poslovanja 2017.-2019.

godina, procjenjuje se da će ovogodišnji ukupni prihod iznositi 1,02 milijarde KM, javlja Indikator.ba.

Neto dobit za 2016. godinu očekuje se na nivou od 1,1 milion KM, dok su projekcije za naredne godine 538 hiljada KM (2017. godina), 1,2 miliona KM (2018. godina), te 4,3 miliona KM (2019. godina).

Osim o trogodišnjem planu poslovanja, dioničari Elektroprivrede BiH će ponovo raspravljati o izvještaju o poslovanju i raspodjeli dobiti za 2015. godinu.

Na Skupštini održanoj polovinom godine glasovima većinskog dioničara, Vlade FBiH, odbijeno je usvajanje finansijskog izvještaja kompanije za 2015. godinu i odluke o raspodjeli dobiti. Nova Skupština na kojoj su ove tačke trebale biti razmatrane zakazana je za 20. oktobar, ali je otkazana zbog "nepostojanja uslova za održavanje".

Prema prijedlogu odluke, dioničarima će se od prošlogodišnje dobiti u ukupnom iznosu od 3.635.735 KM isplatiti dividenda u iznosu od oko 0,08 KM po dionici, a za što je predviđeno 2.611.273 KM u skladu sa ukupnim iznosom subvencija za električnu energiju.

U Fond rezervi društva bit će izdvojeno 20 posto dobiti, odnosno 727.151 KM, a ostatak od 297.329 KM činit će zadržanu dobit.

# OSLOBODENJE

Objavljeno: 21.12.2016.

## Komoratima "Sretno" uz Dan rudara

Danas se u bosanskohercegovačkim rudnicima obilježava 21. decembar, Dan rudara, u znak sjećanja na događaje u Husinu 1920. godine...

...kada su rudari, zbog katastrofalnih uvjeta rada i malih plaća počeli štrajk, a 21. decembra žandari su jakim snagama pokušali ugušiti rudarsko nezadovoljstvo.

Sukob rudara i žandara trajao je sve do 28. decembra, kada je ustanak rudara ugušen u krvi.

U borbama je stradalo sedam rudara, dok je povrijeđeno na desetine rudara i seljaka. Ovaj događaj historija je zapisala kao Husinsku bunu.

Upravni odbor Samostalnog sindikata radnika rudnika Federacije BiH danas će u Sarajevu svečanom sjednicom obilježiti ovaj datum.

Iz tog sindikata najavili su prisustvo premijera Federacije BiH Fadila Novalića, federalnog ministra energije, rudarstva i industrije Nermina Džindića te predstavnika Elektroprivrede BiH nd.d. Sarajevo, javlja BHRT.

Uz svečanost, prilika će biti iskorištena da se kaže koliko su brojni problemi sa kojima se rudari suočavaju. Dotrajala oprema, koja stvara mogućnosti za povrede, a u isto vrijeme sprečava ostvarivanje kontinuiteta proizvodnih rezultata, jedan je od glavnih problema.

Prisutni su i problemi sa zdravstvenim osiguranjem rudara, kao i problem penzionera koji po godinu dana ne primaju penziju.